

Utangulizi

Niseme maneno mawili matatu kabla sijaigia kwenye Neno na Ally Saleh. Siku hizi kuna mawasiliano ya mtandao ambayo yameyakunja sana masafa ya kiwakati na kijiografia yaliyokuwapo hapo kabla baina ya wanaadamu. Nilikuwa kwenye mawasiliano ya *Facebook* Bonn, Ujerumani na Ally Saleh yuko nyumbani, Zanzibar, lakini aliniona kwenye “uso wa kitabu” chake, akakumbuka kwamba kuna jambo alitaka anishirikishe. Nalo ni hili la kumuandikia utangulizi wa diwani hii ya Neno. Hilo ni la ukweli wa mawasiliano katika zama hizi. Sitaona ajabu hata kidogo, nikaikuta diwani hii ikisomwa na walioko huku Ulaya na kwengineko duniani kupitia njia hii hii ya mtandao, siku kinachotoka nyumbani Zanzibar.

Baina yangu na Ally Saleh hapana kuta za ugeni na urasimu, bali daraja la usuhuba na ukawaida. Wenyewe husema, kati yetu hakuna “impitie”, pana “imfikie” tu. Ndio maana japo alikuwa na haraka ya kutaka kitabu kitoke kabla ya Uchaguzi Mkuu wa Oktoba 31, 2010, hapakuwa na ugumu wala kusitasita aliponiomba katika wiki ya kwanza ya Oktoba nimuunge mkono kwa njia hii. Na nani baina yetu angelikataa kushiriki furaha ya kuzaliwa mwana wa mwenziwe? Neno ni mwana wa tatu wa Ally Saleh nimkumbukaye, japo nina hakika hatakuwa kichinja-mimba, maana katika uwanja huu wa uandishi, uzazi wa mpango unaruhusiwa, lakini sio kufunga uzazi! Watoto wawili wa mwanzo ni diwani ya Changamka na mkusanyiko wa hadithi fupi za Jumba Maro.

Sasa Neno. Ingawa kanuni ya kuchambua kazi za kifasihi ziko wazi: unatutaka tuzihukumu kazi hizo kwa kutumia vigezo vya kimaudhui na kifani. Lakini tatizo nililokumbana nalo katika diwani hii ni mahala pa kuanzia, si kwa sababu inakanganya, bali kwa kuwa inalevywa kwa utamu wa kifani na kimaudhui wa kila utungo uliomo. Kila utungo mmoja unainuka na kudai upewe nafasi ya mwanzo kuangaliwa. Kila utungo unapaza sauti yake yenyewe, kiasi ya kwamba hata kama mwandishi angelitumia ule mtindo wake wa Jumba Maro, ambapo kila hadithi fupi moja ilianza na utungo wa ushairi, basi angelitoka na vitabu vingi kwa diwani hii moja ya Neno.

Angalia, kwa mfano, vipande vya tungo hizi nne, kisha hukumu mwenyewe ikiwa ipi itangulie ipi kwa ubora wa fani na maudhui yake:

1. Tungo ya kwanza: Mkono kwa Mkono (Uk....)

Kimya kikatanda, ni wao tu
Mawazo yakawaranda, ya kwao tu
Yao wakayapenda, nani ahoji

Na wakitazamana, kwa karibu
Kisha wakashibana, bila tabu
Hako alowaona, nani ahoji

2. Tungo ya pili: Sikio la Kufa (Uk.....)

Halisikii tena sauti

Si mazuri wala tashtiti

Si lihai wala maiti

Ndivyo lilivyo

Halina tena kujua mambo

Maonevu au majigambo

Limo likifuata mkumbo

Ndivyo lilivyo

3. Tungo ya tatu: Amkeni (Uk.....)

Amkeni, amkeni, amkeni....tayari

Amkeni wachochole

Haya mso na mbele

Ni sasa kusonga kule

Vitendo sio kelele

Amkeni, sukiu ushakucha

Amkeni, amkeni, amkeni....mnachelewa

Amkeni enyi mliokanyagwa

Kwa mabuti yao mkasagwa

Vibana vyenu pindu, kubwagwa

Amkeni, usiku ushakucha

4. Tungo ya nne: Roho Mtango (Uk...)

Roho hakika kama punje ya mtama, watu wanasema

Kwake binaadamu mtego mzima, kupata kalima

Maisha kwake i ya kudamadama, si hasha kuzama

Roho mtango, kama mtungo

Akipata moja huwana kwa mbili, katu hatosheki

Iwapo ni nusu hutaka kamili, hata kwa mikiki

Hula mbichi na mbivu hazilali, huzitia dhiki

Roho mtango, kama mtungo

Kwa kuangalia, tungo hizi mtu angeweza kujiuliza, kwa nini diwani isingelitwa Mkono kwa Mkono, Siko la Kufa, Amkeni au Roho Mtango? Maana kila tungo moja inasimama kama sauti peke yake na inayoweza kuziwakilisha sauti nyengine pia. Lakini huenda hii ikawa ndio sababu diwani ikaitwa Neno, maana kila moja ni neno linalosimama na kunena kwa kauli yake yenyewe.

Diwani hii inaweza pia kuangaliwa kwa vigawe vyake ambavyo tungo zilizomo vinasimamia, japo katika kuyapanga mwandishi hakuchagua nji hiyo. Kuna tungo zinazoweza kuitwa za Hasira kama vile Mpa Changu (Uk....), Kwetu au Kweni? (Uk...) na Haiwezekani (Uk....), za Kumbukizi kama vile Siku Ile(Uk...) na Mavuvini (Uk....), za Mapambano kama vile Kishindo (Uk...) na Tena Shemere? (Uk....).

Kuna jengine la kumfanya msomaji agande kwenye diwani hii: ufasaha wa lugha. Kila fani ina nyenzo zake, na nyenzo kubwa ya fasihi ni lugha; na katika sanaa ya ushairi lugha ndio inakuwa na nafasi kubwa zaidi, maana huhitaji ufundi wa hali ya juu ili beti chache ziweze kufumba yale ambayo yakifumbuliwa yatakuwa kitabu cha kurasa mia moja. Na hilo ndilo Neno. Zaidi ya neno. Angalia, kwa mfano, uweledi wa lugha katika beti hii kwenye tungo Hatumtaki (Uk.....):

Hatufai sisi hatufai

Hatusemi ila tunadai

Hatutaki nazi wala tui

Hadhari, sifanyi uadui

Mshairi anasema kwa maneno machache sana sababu ya kumkataa huyo ambaye wanayemkataa ni kwamba hawafai, na si kwamba wana uadui naye, lakini wana hadhari naye kwamba si wa nazi wala si tui. Mtu kuambiwa si wa nazi wala si wa tui, huwa anaambiwa hana maana yoyote. Na uwezo wa kutumia misemo kama hii hauji ila kwa mweledi hasa wa lugha. Ally Saleh ni miongoni mwao katika zama zetu hizi.

Matarajio yangu ni kwamba diwani hii itasomwa na kila mpenzi wa sanaa ya ushairi na utamaduni wa Mswahili, maana kwa tungo zilizomo, mwandishi wake ametuthibitishia kwamba bado Uswahili kuna watu wenye uwezo wa kuyawasilisha maisha na mazingira ya Mswahili kwa njia ya tungo, kama zilivyo jamii nyengine ulimwenguni.

Ni diwani pia itakayowafaa wachambuzi wa historia na siasa, maana Neno si kazi ya fasihi tu, bali ni matokeo ya msugungano na mkinzani wa kisiasa ambao mwandishi binafsi anaonekana akisimama katikati ya duara lake. Tungo yake ya Nikilipe Nini? (Uk...) inaweza kuthibitisha hili:

Ni mali ya umma

Mambo jamani

Na nimeshasema

Nikilipe nini

Sisi wazalendo, tukalie wapi? Chooni?

Hiyo ni mali yetu

Huja kwa zamu

Nilipeje chetu

Hilo haramu

Sisi wananchi, tumkope nani? Bilisi?

Neno katika fasihi huwa zaidi ya neno. Na hili limezidi neno. Ni mwana aliyezaliwa.

Mohammed Khelef Ghassany

17 Oktoba 2010

Bonn